

PROPER THEOLOGY

(Pa Pathen chung changa kihilna)

Paominlen Kipgen (PK), M.Th

THUMAKAI

Bible doctrine jouse hetchetna dinga Pathen'a patngai ahi. Tulai mitamtah in Pathen aumpoi ti photchet ago jiuve. Ahim hima jong mihem khat dinga imu theilou, khoikhah theilou khat aum monge tia tahsan dinghi thil hahsatah ahi (1 Cor.2:14). Ahin hiche boina hi Christiante dingin Bible abulpat pena seilhapna imuvin ahi (Gen.1:1). Bible hi Pathen aum monge ti photchetna lekhabu mai hilouvin, aum mong chu abulpat pen pena aseipai jengin ahi.

I-Bible'un thengselin Pathen aumpoi tiho chu mingol ahi tin asej jengin ahi (Ps. 14:1). Hijeh chun miching hetna nei jouse chun Pathen aume tihi anop lhah ngai ahi.

BUNG – 1

PATHEN UMDAN MIHEMTE GELDAN LEH TAHSAN DIHLOU

1. DEISM: Hiche theory in apomdan chu, “vannoi leiset le asunga umho thiljouse hinsema vang chu Pathen ahin, ahinla thilsem hohi angahtup le avengtup umlouva ama chama kinga cheh ahiuve”

2. ATHEISM: Pathen aumpoi chuleh thilsem ho jonghi ama chamma hung umdoh cheh ahiuve tia tahsana ahi.

3. SKEPTICISM: Pathen kiti hi um mong ahina dem tia tahsan ding lung thoi jing tahsan lelina neijing ho kiseina ahi.

4. PANTHEISM: Hiche hi imajouse'a hi Pathen uma ahin chuleh thiljouseh hi Pathen ahi ti tahsana ahi. Hindu ho tahsan dantoh kibang ahi. Pathen vang aum monge tichu atahsanun, ahinlah aumdan dingle aumjie chu ahet theilou jeh uva Pathen chu imajouse'a um ahin, imajouse hi Pathen ahi ti'a thilsem hou ho ahiuve.

5. POLYTHEISM: Pathen tampi aume ti tahsan.

6. MONOTHEISM: Hiche theory hi Pathen khatbouseh aume ti tahsan na ahi. Ahin Pathen khatseh umdan thum'a um (trinity) umje chu atahsan pouvin ahi.

7. AGNOSTICISM: Hiche theory hin atahsan chu, Pathen khatvang aum monge ahinla mihemte hetthei ding dan vang ahipoi ati.

BUNG – 2

PATHEN AUM MONGE TI PHOTCHETNA:

1. THILSEM (Cretion) ‘AKON AKIPHONDOHNA

Psalms 19:1 na’a “vanlai jola thilsem hoitah leh loupitah jousen thengtah’in Pathen aume atiuvin aphongdoh’ui”. Rom.1:20 na’in “thilsem hohin tonsot Pathen thaneina aphongdoh’e” ati. Hijehhin Bible tahsan jousen Pathen aum monge ti anop ngai ahi.

2. CONSCIENCE (se leh pha hetna’a kon)

Mihem jouse hi thanei chungnung (supreme being) khat aume ti tahsana toh pentha sohkei ahin, hiche thanei tah chun ima jouse hi asema athunoija akoi ahi ti ahe cheh’un ahi (Rom. 2:15; Acts 17:23). Ahin Atheist phabep in se leh pha hetnan Pathen aume ti ahetsah poi tin asejui. Ahin hichu atahsan nomlou naochun ase leh pha hetnao chu atha mitji ahitai. Mihem khatnin amitchot mana van, ahshi, lhathah, leiset, thing le song aumpoi atithei ahinai. Ahinla hiche mana chu hicheng chu umlou ahidehpon ahi.

Mitamtah’in Pathen amulou jeh’a aumpoi atiu hilouvin, alung dei bolding angapchat loujeh’uva aumpoi atijiu ahijoi. Atheism hi satan’in huhhingna lampi mihemin amuthei louna dinga alhim ihmutna khat ahi.

Mihem jouse se leh pha hetnan Pathen aum monge tia ase tei ahi. Hinlah mingol bouvin hichu ajah da ahi. Vanlam vetna Pathen imulou jeh’a aumpoi ti jenghi ngolhoi tah, vanleng aleng lai vetna atolpa (pilotpa) imulou mana atolbeija leng ahi titoh kibang ahi. Koima alhoh buh mukha aumpoi, ahin anatoh akon lhohbuh ineiju ihet cheh’u ahi. Hibang chun thilsem imu uva kon Pathen aum monge ti sele pha hetnan eiseipeh teiju ahi.

3. COSMOLOGICAL ARGUMENT (asemkhat aum monge ti’a kon photchetna)

Leiset aume, hiche hi hoija konham khat hitei ding ahi. Koiham khatnin itih phat lai hama chu anasem hitei ding ahi. Lekha bu hi koiham khatnin ajih hiteiding, hoilai press hamkhatna abu’a kistem doh hitei ding ahi. Bench, table, pen etc jong asema aumteijin, hibang chun leiset jong asem umtei ding ahi.

Mobile phone jonghi mikhatnin asem doh ahin, hiche asemdoh sa jonghi kiphet lha henlang tinsung khatna kiheng hen kum tampi kiloh le hitobanga hi asutoh beija kisutoh louding ahi. Leiset jonghi achingtah khatnin tu dinmuna hi asemdoh ahin, hichu Pathen tailou koima dang hilou ding ahi.

4. TELEOLOGICAL ARGUMENT (akisem toh, akigontoh, ajeh neichit chetna akisem dana kon photchetna)

Mobile phone hi semdoh ahigoh hilouva agong toh khat uma, amanna neidinga kistem ahin; hichu gal gamlha’a kijahmat tona dinga kistem ahi. Phone hi mat chenna dinga kistem ahapon, sihmi buhdinga kistem jong ahipoi. Hibang chun leiset chung alet, aneo, agong umdan jouse, thilsem jousen panna aneicheh dan hi ivetleh chingtah khatnin ajeh neicheh dinga asem ahi. Ganhing vacha jonghi achama soh hilou ajehnei cheh le akivenbit theina dinguva arong/colour jong hi kipechek ahiuve. Hijeh chun thiljouse ajeh neicheh leh panna neicheh’a kistem ahidan hin hoitah’a gong toh

chetna panna neidinga semkhat aume ti akihe theijin, hichu Pathen tailou koima dang hilou ding ahi.

5. ANTHROPOLOGICAL ARGUMENT (mihem hindan, chihna, hetna aneidan'a kon photchetna)

Mihem hinkho, achihdan, akam akon apaothei dan leh athusei theidan, alhoh buh mamchah thepdan le adang dang hi ivetleh ahung moh umdoh jeng hilouvin, ama tobang ahing thei khat, chihna thepna neikhatnin asem ahi ti akilange (Gen. 1:26,27, Ps. 94:9). Asem pa chu hinna, hetna, chihna boltheina adang dang nei ahina bana, thenna nei chuleh chonphat ngailu'a chonset ho'a ahi jala mihem hin selapha hetna, adih adihlou, apha ase lhentheina jong asemtha'a anei ahi.

6. LIFE ARGUMENT (Hinkho hung umdan na kon photchetna)

Hinkho hi hinna nei khat hinkho'a kon ahin, hibang chun mihem hinkho jonghi hinna nei tonsot hinna nei, leiset hinna jouse kipat masanga ana hingsa, tonsotna hingjing ding khatnin asem hiding ahi (Ps. 36:9; Jn. 11:28). Tekahnan haithei hi haiphunga kon hinna anei ahin, kelngoi nou chun kelngoi pi'a kon hinna anei, chubanga chu mihem masapen jong chun amabanga hinna nei khatna kon hinna anei hitei ding ahi.

7. ONTOLOGICAL ARGUMENT

Mihem jouse hin alunga thilkhat agela tahsan na aneikhat chu atah'a jong ana umtei khat ahijin, chuleh lhangpi tahsan khat chu atah jong ahinom teije. Hibang chun mihem jousen Pathen aum monge ti'a ageluva, ahou uva ajaboluva atah san danu hi ivetleh lhangpi'a tahsan khat ahin, lhangpi tahsan khatchu atah jong hitei ahi.

BUNG – 3

PATHEN AMA LE AMA ITI KIPHONDOH EM?

Bible'in Pathen ama leh ama akiphondohna tampin aseijin ahi.

1. PATHEN HI THILSEM HO (nature)'A AMALE AMA AKIPHONG DOH'E

Koi hileh mitnei jousen, "vanlai jollin Pathen loupina aphong doh'e (Ps. 19:1-6; 29:3-9; Acts. 14:17) akitin, Hiche hi Paul in Rome 1:20 na'a ase chu ahi.

2. PATHEN CHU THILSOH THUSIM HO'A AMA LE AMA AKIPHONG DOH'E (History)

Judate thusim, Pathen'in Abraham akouva pat (Gen.12) ivetleh Pathen itobang tah'a thaneitah'a achunguva kilahham ti imu've. Adeh'in Israel te Egypt gama asoh chan naova kon huhdoh ahina chunguva Pathen thahat tah aumonge ti akimuchenin ahi.

3. PATHEN CHU MIHEM HO'A AMA LE AMA AKIPHONGE

Pathen'in ahina ngailutna chu themgao Hoshea in lunghem tah'a aji kitah lou Gomer to akigui jopna hon chungu akiphonge (Hichu Hoshea hi Pathen to vetchep ahin, aji kitah lou chu Israel mite toh vetchep hija ahi). Jesun agil keh ho vahding, innei louho immun kicholdona pehding tin aseijin, hiche hohi amatoh kiguijopna'a lutna ahi ati (Mtt. 25:40). Midangho toh ikigui jopnao, midang

ingailut naova kon hin Pathen hina ngailutna hi ihechen thijun, midangin jong amuchen theijun, midangin Pathen eiho'a amudoh theijin ahi.

4. PATHEN CHU AMALE AMA GAOVA AKIPHONGE

Pathen gahmu dinghi OT'in ahithe dinga agel lou khat chu ahin, 'koiman kamai amu theilou ding ahi, koihileh eimu'a chu thiding ahi'(Ex.33:20) ti'a jong anakisei ahi. Ahijeng vangin Pathen'in Jerusalem'a themgao Isaiah chu gaova ana kimusah'in ahi (Isai.6:1ff). Chuleh Pathen'in gaova ahin, mang chung chonna ahin aum monge ti photchetnan thil tampi pi mihemte anamusah jin ahi.

5. PATHEN CHU AMA LE AMA THU HING (Living Word) NA AKIPHONG DOHE

Hiche hin Christa Thu ahingthei chu aseina hin, Pathen chu ama le ama bulhing setna hiche'a hin akiphong doh'e (special Revelation – Heb. 1:1-2)

6. PATHEN CHU AMA LE AMA THU KISUNNA (Written Word/Scripture)'A AKIPHONG DOH'E

OT sunga Pathen chu thu kisun (Bible/dan) ho'a akiphongdoh'e. Tekah nan Joshia khanga kismethah na (2 Kgs. 23:1ff). Tulai khang jenga jong Bible hi Pathen aumonge ti ihet nao ahin, Asunga thu hohi ama'a kon ahi ti itahsanui.

7. PATHEN CHU AMA LE AMA LHAGAOVA AKIPHONGDOH'E

OT khanglaijin Pathen'in athaneina ahin alunggel ahin agomin lhagaova ana phong doh'e. Lhagao chun mihemte thahatna kidangtah anapeji'e; tekahnan Jephthah (Judg.11;20) Samson (Judg.14:19). Chuleh Lhagao Theng umchun Pathen amatah aume ti avetsah'e (Ps. 51:11). NT sunga jong Lhagaovin mi apui hoidan tampi vei akimun ahi (Acts 8:29; ;10:12,19; 16:7). Masang laija ana boljing ngai bangin Pathen hi tuni chanin Lhagaova akiphong doh jing nalaije.

BUNG – 4 **PATHEN HINA (NATURE OF GOD)**

Pathen hina isei masangun, Pathen hi hina khat nei, hiche ahina chu alim le mel banga asem mihem ten jong anei diuva adei, thupuh jong anei ahin; Tekahnan: Pathen chu ngailut ahi akitinan, ahivanga alung loulama leh alung toh louho chung lunghang le gotna pejengji jong ahi. Mitampi Pathen hi ahina langkhat sehseh ve'a alangkhat velou (lungset ahi sehseh ve'a phula le lunghang thei ahi hephalou) atam ji'e. Hijeh'a chu Pathen thenna leh chonphatna hin chonset hi athoh theilou, thina chana gotna chang dinga thutep anei ahi (Rom. 6:23; Ex. 18:20). Pathen hi hina (ni) kibang chet langkaina beihela nei, chonphatna kipa pi leh chonsetna ho'a; Ngailut jong chan jileh gimbolna jong chankhom thei Pathen ahi ti het ngai ahi.

Pathen hina iti teng anei mai mai hilou ahina (nature) kiseina ahin, hina atihin ama'a um mong mong atibah khat tobang aseina, ama'a umden hina kilamang theilou aseina ahi.

Pathen aum monge ti ihet chet theina dinguin Pathen kiseina ahilouleh kiphondohna leh ahina (Nature/attributes) phabep, Old Testament na kon leh New Testament na kon Israel ten anamu danu, Pathen mite leh Solchah hon anamudoh danu veohite (discription of God).

1. Pathen aum monge. OT hin Pathen aume ti hi photchet asom ahipon, ahin Pathen chu aumsa ahi tin asej jenge. Judaten jong Pathen hi aum monge ti alungsunguva ahetsao ahi ji'e. Hijeh'a chu mingolin bou Pathen aumpoi ati (Ps. 14:1) kiti ahi. Mose henga akilah chun Pathen theoboh konga akilah'e (Ex.3). Mosin amin adoh chun Pathen'in amin chu "KEIMA" tin ana donbutnin (Ex.3:16), hiche hin Pathen min vetsahna "tonsotna umjing ding leh ana'umsa hatchungnung Pathen" sein ahi.

2. Pathen hi kitah tah ahi. Pathen natoh thilbol jouse hi atah le achamkim ahisoh keije. Aman adihlou abol ngaipoi. Amahi Pathen thutah hija ahi (Deut. 32:4; Ps. 31:5; Jer. 10:10). Chuleh aseidoh thucheng jouse jong hi thutah jeng hija ahi (2 Sam. 7:28; Ps. 119:160). Hiche in avetsah chu anatoh athilbol jouse hi ahina kitahna phondohna ahisoh keijin ahi.

3. Pathen hi pha ahi (God is good). NT'a Paul'in Pathen hina Pathen chu chonpha ahi tin amangchan, OT a jong hitobang chun Pathen chu atheng chuleh chonpha (just) ahi tin aseije. Lev. 19:1 na'a Na Pathen'u keima hi atheng kahin, keima kathen banga nangho jong nathen diu ahi tin aseije. Pathen thenna le chonphatna'a hi atheng louleh apha lou imacha beh lou ahin, Athen jaleh chonpha ahi jalla Pathen chu pha'a ahi.

4. Pathen in thu asej ji'e. Pathen hi thuseiji Pathen ahi. Aman thilsema chun 'vah umhen' atileh aum jenge. Honsunga Adam toh akihou limin, Abraham jong chu achen a mun hindalha'a hungpot doh dingin aseijin, Mose jong chu theoboh kong lah'a kon akihoulim pin, themgao ho jong chu Pathen'in ahenguva thu aseiteng thuchu asejiuva, ajih thei bep'u ahi. Pathen'in thu khat asej teng thu chu natoh asodoh teitei jin ahi. Athusei doh chu natong lou le aga sepdoh louvin akile ngaipoi (Isai. 55:10).

5. Pathen'in na atonge. Aman leiset chung/vannoi leiset asemin, mihem jeng jong chu leivui alah'a akhut tah'a asem ahi. Akhut alhangin thusim ho jenga jong na atongin, Israelte lah jeng hilouvin thusim ho ivetleh chidang namdang lah jenga jong anatoh akilangin ahi (Isai. 10:5).

6. Pathen hi khat ahi. Canaan mite ho Pathen toh bang louvin Judaten Pathen hi pumkhat ahi ti ahe'un, aphonng doh'ui. Muslim te jengin jong Pathen hi khat ahi ti'a aseiju khu Judate akon alah sonu ahi. Deut. 6:4 na'a "Pakai iPathen'u hi khat ahi" akiti. Chuleh danthu ho lah'a amasapen jong chu "Nanghon keima na Pathen'u hi khat bou kahi ati (Ex. 20:3).

7. Pathen hi mihing ahi. Pathen'in amai mihemte amusah nom louva asel jengji vangin (Ps. 104:2), OT in Pathen chu mihem tobang ahi tih tahsan lel na aneipoi. Pathen limle mel banga mihem kistem hin Pathen mihem tobang ahidan akilange. Chuleh OT sung se'se'a Pathen mihemte toh kiguijopna anei, mihem pao banga apao, natoh banga atoh, lunggel banga agel, hohin mihem ahina akilange.

8. Pathen hi lhagao ahi. OT bulpat til chun Pathen tahsa tah'a auma Eden hon sunga alamlah dan aseijin (Gen. 3:8), ahin OT mundang tam tah'a vang Pathen hi Lhagao ahin, mihem khutsem houin sunga cheng ahipon, van sangpen jengin jong adol lou ahi ati (I Kgs.8:27). Lhagao ti hin Pathen umna aphonngdoh'e (Ps. 51:1).

9. Pathen hi atheng ahi (Holy). Pathen hi atheng hijeng ahi. Then ding kiti hi chonsetna jouse, thenlouna jouse'a kon onthol ding tina ahi. Chutobanga chu Pathen hi thenga ahi (Habk.1:13; Ex. 15:11; 1 Sam. 2:2; Isai. 6:2; 1 Pet.1:15-16). Pathen thengtah chu mihem chonsetna lhasa ho'a kon kikang se ahin; hinlah Eph. 2:13 na'in "Christa thisan jala bou ana gamlha sa hijong leuhen tu'a hi inaitheiju ahi" ati. Hijeh'a chu Pathen thengtah heng inai theina diu lampi umsun chu Christa thisan jal ahi. Pathen thengtah chun chonset hi athet mama ahin, hijeh'a chu chonset chung a gotna peh dinga alhuhsah ahi. Ahin Christan hiche chonset chung Pathen lunghanna chu achunga achuh sah'in Pathen chu asulung lhai tai.

10. Pathen hi ngailut ahi (Love). 1 John. 4:8 na'a "Pathen chu ngailut ahi" atin, hiche hin Pathen natoh aseina hilouvin ahina mongmong (Noun/amin) aseina ahi. Hijeh chun Pathen chu kalung sunga achen vangleh ngailutna kanei ding ahi. Ajeh chu Ngailut chu kalung sunga cheng ahi (cf. 1 Jn. 4:7). Ahileh ngailut hi ipiham? Ngailut hi ngailut ichanpa/nu kipa na ding deisah ahi. Ngailut dihtah chun michonsete leh amelma jengjong angailui (Mtt. 5:44,45). Pathen mingailutna hi achapa le tahsan ho jouse chung a akilange (Jn. 16:27). Pathen'in vannoi angailut ahin (Jn. 3:16), hijeh'a chu mihem ho chu amelma le alung deilou lama kihei gam tajongleu huhhingna achan nadiu lampi agon peh'in, lunghan naleh thina achan diuva kon ahuh doh'e.

11. Pathenhi kitah ahi. Ajeh chu amahi kitah (honest) le kikhelou ahi. Pathen kitahna sandan Ps. 36:5 na'a akimun, Pathen natoh jouse hi kitahna'a kibolngen ahi (Ps.33:4). Pathen kitahna hi athusei jouse le akitepna jouse amolso akon akilange. Pathen hi kikhel ngailou ahin, jou jong jou ngailou, alungjong ahei/kisih ngai lou ahi. Pathen'in akitepna jouse – eivenbit diu, lam eihil dingu leh adang dang jouse abukip ding ahi (2 Tim. 2:13; 1 Cor. 10:13).

12. Pathen hi khotona'a dim (Merciful) ahi. Ps. 103:8; Deut. 4:31 na'a "Pathen hi mikhoto na'a dim ahi" akiti. Chonset chung a/jeh'a gentheina le engbolna pehtah sangin Pathen chu mikhotona'a dim ahin vangbohna, tahsa damna, nopsahna leh leiset kipana – huhhingsa holeh mangthai ho agomin apei (cf. Mtt.5:45). Pathen thaneina chun koichu khotona chanding ham alheng theijin (Rom. 9:15,18) chuleh angailut holeh adan thupeh juiho asang sang chung a khotona anei theije (Ex. 20:6). Pathen khotona hi lentah ahin (Ps. 103:11,17), Ama'a kingaiho chung a khotona aneije (Ps. 32:10). Michonse khatnin alung ahin heija Jesu heng ahung teng ngaidam achana dinga thildang angaichat hilouva amikhoto na ahol ahijoji'e (cf. Ps. 51:1).

13. Pathen hi chonpha ahi. Thutah ahigoh hilouva Pathenhi chonpha jong hija ahi (Deut. 32:4; Ps. 19:9). Chonphatah ahijala chu athutan na jong dihtah hiding ahi (Isai. 45:21; 1 Sam. 2:3; Gen. 18:25). Pathen chonpha ahina hin aphant chet chetna thilpha abol ji ahi. Pathen chonphatah hi thutan nunungpen (final judge) jong hung hiding, thiljouse chung a thutan hung hiding ahi (1 Kgs. 6:32).

14. Pathen mihem ahina/Pathen'in mihem hina anei: Mihem hina tihin mihem in anei hetna, lunggel lhen theina tha aneihiseina ahi. Milim kismethu holeh ahing theilou thil hon hitobang hi aneipouve. I Pathen'u hi ajat chombe ahing leh natohna jatchom chom nei ahi. Pathen hi mihing ahin, akimu theilou thilbolthei thahat nei maimai ahipoi. Jer. 10:10; Acts. 14:15; 1 Thess. 1:9; 2 Chr. 16:9; Ps. 94:11 hohin Pathen ahingjing, athanei dan leh mihemin anei ahina le hetna ho avetsah'in ahi.

15. Pathen hi Lhagao ahi. Lhagao hin phe, gu, leh thisan aneipoi (Lk. 24:39 cf. Jn. 4:24; 1 Tim. 1:17; 6:16). Pathen Lhagao ahi atina hin mihem banga mutheija hinga, neh leh don jonglou, munjouse'a hingthei leh ijakai bolthei na tha aneina hi aseina ahi.

16. Pathen hi Pumkhat (Unity) ahi. Pathen helouho pathen tahsan tobang hilouvin eiho Pakai Pathen hi khat ahi (Deut. 5:4; Isai.44:6; 45:21).

17. Pathen hi tonsotna umsa leh umjing ding ahi (Eternal): Pathen dih tah chun kipatna leh kichaina aneilou ngai ahi. Milim ho vang hin kipatna, mikhatnin ahin semdoh nikho aneicheh'ui. Ahin eiho Pathen vanghi kipatna neilou, kichaitih jong neilou ding ahi (Ps. 90:2; I Tim. 1:17; Ps. 102:24,27; Isai. 57:15).

18. Pathenhi thaneipen, imajouse chungu thanei (Omnipotent) ahi. Gen. 1:1 na'a vanle lei asemin, semtheina tha aneije. 1:3 na'a vah umhen atin, vah aumjeng. Hiche hin athun jong thaneina aneije ti avetsah'e. Aman thil jouse mihem ho thilsem to bang louvin ima cha umlouva konin asemboh'in, ahoipen leh achamkimin asemboh'e. Pathen hin chonset tilou bolmo aneipoi. Ijakai bolthei ahi (Job. 42:2; Ps. 33:9; Jer.32:27).

19. Pathen hi phat khatna munjouse'a umthei (Omnipresent) ahi. I Kings 8 :27. Hiejeh'a chu Ps. 139:7-9 na'in na'angsunga kon hoiya kakisel thei dingham!" tia asehi ahi (cf. Jer. 23:23; Eph. 1:23). Pathen hi munjouse'a um ahin, vannoni leiset pumpi hi a'angsung ahi, mihem lungsung sungnung pen geija um, twithuh pen leh vansang pen geija um ahi.

20. Pathen hi ijakai he (Omniscient) ahi. Ama'a kon ima akisel theipoi. I Chr. 28:9 Pathen hi lungsung jouse kholtah, mihem jouse lunggel he ahi (cf. Ps. 94:11 ati. Job. 42:28; Dan. 12:20).

21. Pathen hi loupai ahi (Ex. 15:11)

22. Pathen hi lungset them ahi (Ex. 34:6; Nahum. 1:2)

23. Pathen hi thangthip tah ahi (Joshua. 24:19, Nahum. 1:2)

24. Pathen hi nasatah/lentah/great ahi (2 Chr. 2:5; Ps. 86:10)

25. Pathen hi mutheilou ahi, (Job. 23:8,9; Ps. 92:15).

26. Pathen hi vah ahi, (Isai. 60:19; 1 Jn. 1:5).

27. Pathen hi chamkim ahi, (Mtt. 5:48).

28. Pathen hi hingjing/umjingding ahi, (Immortal), (1 Tim. 1:17; 6:16).

29. Pathen tobang koima aumpoi, (Num. 14:18; Micah. 7:18).

30. Pathen hi mihepi them ahi (1 Kgs. 8:23).

31. Pathenhi holdoh joulou/unsearchable ahi, (Job. 11:7; Ps. 145:3).

32. Pathen hi chondihtah/upright ahi, (Ps. 25:8; Ps. 92:15).

33. Pathen hi apha ahi, (Ps. 25:8; 119:68).

34. Pathen hi kikhel theilou/kikhel ngailou ahi, (Ps. 102:26,27; James. 1;17).

35. Pathen hi thutah ahi, (Jer. 10:10).

36. Pathen hi kisubohtheilou/bohbehlou ahi, (Rom. 1:23).

37. Pathen hi mei/thilkavam thei Meikong ahi, (Heb. 12:29).

BUNG – 5

PATHEN MINHO

1. ELOHIM

Hebrai paova Pathen tina ahin, athahatna le athaneina vetsahna ahi. Elohim kitihi Pathen khatseh ahivanga tampi sein a banga kimangcha thucheng khat ahi. Bible themhon Trinity Apa, Cha, Lhagotheng Pathen pumkhat hina'a kimangcha thucheng ahi tin aseijun ahi (Gen. 1:1,26,27; 3:22; 11:7). Hiche thucheng hi Bible sunga 2570 vei akimui.

2. ADONAI

Hebrai paova Pakai tina ahin, Greek paova '*kurios*' kititoh kibang ahi. Hiche hin Pathen chu thilsemho jouse neipa ahina avetsah'in ahi. Mihem lamdola akimanchah tengleh apupale asohpa, ahilouleh ajipa leh ajinu kakah'a kijopmatna hetna'a kimangcha thucheng ahi (Gen. 24:19; 18:12; Heb.2:16; Jn. 13:13; Isai. 54:5; Jer.3:14; Deut. 33:;12).

3. JEHOVAH/YHWH

Hebrai paova alhangpi'a Pathen min kihetna khat ahi. Hichehi adehsetna Israel Pathen tina dehsetna kimangcha Pathen min ahi (Ex. 6:2; 3:13-16). Jehovah ahilouleh YAHWEH/YHWH kiti Pathen minhi Bible sung pumpi'ah 6823 veijen akimun ahi. Hiche minhin avetsah chu ahileh Pathen chu ama chamtah'a ana'umdoh tina ahi (Ex. 4:13). Ahin hiche minjong hi achanga kimang cha behlouvin adang 9 tohin akiseimat jie

- a. Jehovah Jireh: Pathen'in/Pakaijin hinngaito nante (Gen. 22:8,13).
- b. Jehovah Nissi : Pakai chu Kaponlap/kagaljona ahi (Ex. 17:50).
- c. Jehovah Shalom: Pakai hi chamna ahi (Jud. 6:24).
- d. Jehovah Shaboath: Pakai chu thaneipen ahi (Isai. 6:3).
- e. Jehovah Raah/Rohi: Pakaichu kelngoichingpa/kelngoipu ahi (Ps.23:1).
- f. Jehovah Tsidkenu: Pakai chu ichonphatnao ahi (Jer. 23:6).
- g. Jehovah Shammah: Hikomhi Pakai umna ahi (Ezk. 48:35).
- h. Jehovah Rapha: Pakai chu eiboldampau ahi (Ex. 15:26).
- i. Jehovah Maccaddeschem: Pakaichu nasuthengpa ahi (Ex. 31:13).

BUNG – 6

PATHEN PA AHINA

Mtt. 6:9 na'a "Vanna um ka Pau" atin, hiche hi Pathen ihetnao kipana chungnung chu ahi. Semthu Pathen houhon Pathen, ngailut Pathen vanna aume ti ahepha pouve. Pathen helouhon Pathen hi kichat umtah, khohtah, aginna ginding, kichat dingin agelui. Ahin Bible in Pathen hi ngailut Pathen, loi le golpha tah, kivoppi thei, kihoulim pithei, le dei umtah ahi ati.

Pathen hi Pa'in jatni'a akilah'e.

1. Pakai Jesu Christa Pa (Jn.5:17; 1:14)
2. Jesu Christa tahsan jouse Pa (Jn 1:12).

Judaten Pathen hi Pa ahina jatnin aseijui

1. La lamma – Ps.68:5 Pa neiloute pa, Meithai ho dinga achugthu tanpeh pa, atin
2. Nam sung to kisaijin Ex.4:22 Israel te hi achapate ahiuve tin aseijui.

Ahin Israelten Pathen chu aPa u ahi ti ahechen pouve.

Modernism ho "Pathen hi kappa ahin eisu se ahiloule lungphat mosah ponte, hijeh chun noptah'a kaumding, kaneh ding, kadonding, kakipa ding chuleh achaina leh Aman eihin khoto thou thou ding ahi" atiuve.

John. 8:44 na'ah Jesun "Nangho napau diabol'a nahiuvn, napao lungdei lam nabol diu ahi" anati. Hiche hin Pathen hi ijakai sempa ahin, Ahin a'insung mite ding bouva Pa hija ahi. Pan achate hinkho apeh ahito lhonin, penthahna lou chu Pathen cha hithei ahipoi. Pa khat ahito lhonin Pathen'in achate angailun, ataonao angaipeh'in athumu apeh ji'e.

BUNG – 7

PATHEN THIPNA/AUMTHIMNA (Silence)

Hahsatna ato tenguleh mihem in, "Ngailut Pa Pathen aumleh ipi dinga donlouva eikoiham? Ipi dinga hitobang hi kachunga alhunsah ham? Alhunsah da thei hilouham?" tiho aseijun, alung agel ji'ui. "Ipi dinga thilsoh gimnei, setto, thina,natna, galle tol... hohi akhamtang louham?" Job. 23:3,4 na'a jong Job'in Pathen chu mutheiding le alaltouna'a chethei ding hitave hen, aboina jouse gakiseihen, kakiki nelpi leh ti anom ngei. Ps. 28:1 na' David nin, " Nahenga katao ahi. Pakai kasongpi, Neithip san hihbeh'in..." anati.

Hiche chung changa hin lunggel jat chom chom aume.

1. **Deism** - Pathen hi Pathen pha ahin ahi'a mihem hinkho aning akah vetchilna dia phat aneilou ahi. Pathen hi mihem hinkho ve maimai ahibouve.

2. **Atheism** – Pathen thipchetna aum ji hin Pathen hi jou ahibouve, Pathen umlou ahi kilahna ahi. Pathen hing aumleh na ahintoh teiding ahi.

3. **Materialism** – Leiset chunghi Pathen jao louva dan (law) in avaipoh ahin, vang jeh'a bou um ihuvin ivanguva kingam ahi.

Ahin hiche hi adonbutna dih ahijoupoi. Adonbutna ipeh thei penu chu Bible dungjujin

1. **Ichihthei ji loujeh'u ahi.** (Common sense view) Boina tamtah hi mihem te ichihthei jilou jeh'u, ingol ji jeh'u va sohдох ji ahi. Tekah nan accident ho bang. Gal. 6:7 nan mihem in atu tu chu a atding ahi ati.

2. **Reverent view** (Jana puma lunggel). Pathen thaneipen natoh thilbol chu iti ken kadoh thei dingham? (Isai. 55:8,9). Pathen nin mihem te dinga alunggel chu lungghemna, natna leh tohgim na jong jao ahi.

3. **Philosophical view** (Chihgilna lampang lunggel). Mihem hin chamlhat lunggel kinei ahin, Hiche icham lhat lunggel chungu chu inatoh hou jong kingai ahi. Mihem chamlhatna kitihin eima le eiman ihinkho'a mopohna jong akineije atina ahin, tekahnan jonthan hoijeh'a nat phalou kivei ho AIDS ho bang hi eima mopohna ahi.

4. **Lovers view** (ngailut lampang lunggel). Pathen hi thangthip tah'a mingailu ahi (Ex. 20:5). Hijeh'a chu thildang jouse toh ikikhenuva ama jengbouva ikingai/ngailut nadiuva abol ji ahi.

5. **Dispensational view** (Phat to kisaija lunggel). Tu hi mihem phat, chonset phat, lungset phat ahi. Pathen in "Inna hungin" ti'a eikou phat'u ahi. Ahin thutan na nikho chu hunglung ding chuteng Pathen umthim le thipna chu phongtah'a demna'a hung kiphong doh ding ahi.

6. **Faith view** (Tahsan to kisaija lunggel). Jn. 13:7 "...olla nahin het diu ahi" atin, lung neng tah'a ngah dingin eihilui.

7. Tahsan patepna ahi (1 Pet. 1:7).

8. **Pathen natoh kidangtah chu ahi.** Jn.9:3 na'a Mitcho pa chu ama chonse ahipon, anule apa chonse jong ahipoi; Pathen natoh loupki kiphon nading ahijoi ati. Nangma chonset jeh'a nagenthei jong hilou maithei ahi ahin midang dinga vangboh channa jong hithei ahi. Ajehchu Pathen'in angailuho dinga ijakai hi aphotna dinga abol ahi (Rom. 8:28).

BUNG – 8

TRINITY (THUM KHAT-KHAT THUM)

Tuchana chu Pathen hi khatsehseh ahi itiuve (Deut.6:4). Ahin Bible hi hoitah'a isim leh Pathen hi thuma akilah'e ti akimui. Ahileh iti danna thum hija Pathen khat bou hikik thei ham? Pathen thum tiding hilouham?

Trinity chungchang hi hetphah jouleh mihem lunggela suhto jou ahipoi. Isai.55:8,9 na'a Mihem chihna/lunggel lhahsam dan leh Pathen chihna san dan akimu theije. Hijeng jongleh Trinity kiti thucheng (thumkhat, khatthum) hi bible munkhat cha'a jong akimupoi.

1. TRINITY KILAHNA/KIPHONDOHNA

a. **Jesu Baptistma achan na'a.** Mtt. 3:13-17. Pa Pathen chun vanna konnin thu ahinseijin, Chapa Pathen noijsa John Baptist khutna Baptize achangin, Lhagao theng Pathen chu Vakhu banga hung lenglhan Jesu chungu achu'e.

b. **Baptist channa'a thucheng kisei dungjuija.** Mtt. 28:19 na'a Nangho cheuin lang, Apa, Acha, Lhagao theng minin Baptize gabollun.

c. **Thukhumkha na'a.** 2 Cor. 13:14, Pakai Jesu milungsetna, Pathen mingailutna, Lhagao theng kithopina/umpina chu nangho'a umjing taken.

d. **Thilsem ma.** Gen.1:26 na'a Pathen in eihon eiho lim bang bangin mihem khat semu hite.

2. TRINITY HILCHETNA DINGA TEKAH'NA

a. Mitheng Patrick in anahilchetna achun hitin aseije anati. Thing na khat (Shamrock kiti) abah/aning thum hija, ahi'a thing na khat bou hi ho.

b. Water – twi hi thumma akilah'e. Twi, buhbang leh vadung/lui, ahin abonnun twi ahisoh keijun a formula jong H₂O ahitou thouve.

c. Business firm: Smith & Co., ucha thum, John, Henry leh Peter ho'a. Hiche hi company khat bou hija, ahi'a ucha thum ho chu department khat cheh'a alenpen hicheh'u. Athumuva khatna umkhomu ahi'a mithum hiu.

d. Kei. Mikhat bou kahi vangin thumma kakilah theije. Kanu'a dingin achapa kahin, midang jousen eimuna toh akibang pon, ama kabol natoh midang kabolna jong akibang poi. Kachate dingin apau kahin, midang kamuna toh kachate kamuna jong akibang pon, amahon kei eimuna'utoh midang amu u jong akibang poi. Athumna Pastor kahin, kigui jopna chombek ka houbung mite toh kanei kitne. Keichu khat kahi thou thouvun, ahin kakilah'na chu thum ahi. Cha, Pa leh Pastor kahi.

Ahin chungu kisei hilchetna hohi alhing joupoi. Iti akihil chet got jogle Trinity hi thilkidang ahin ahilchet ji umlou, mihem chihnan aphah jou lou ahi. Pathen chu Lhagao ahin eiho tahsa ihuvin Lhagao thu chu hetcham kim umthei lou ahi. Chuleh Pathen chu chamkim ahin, eiho ihipouve; hijeh chun hiche hi hilchet ahahsai. Ahin Pathen chu khat ahin tonsotna umjing le umjing ding ahin, ahin Pathen hi thumin akiphong doh'in hichu Pa Pathen, Chapa Pathen, Lhagaotheng Pathen ahi.

2. TRINITY PUMKHATNA ANATOH'U

a. **Thilsem na'a** . Gen.1:3, Pathen in Vah umhen atin, Hilaija thu aseidoh na hi Chapa Pathen ahin (Jn.1:1) Lhagao theng chu twi chungu alam lhalen ahi akiti (Gen.1:2; Job.26:12,13).

b. **Jesu Mihem ma apen na'a.** Pa Pathen'in AChapa apen (Jn.3:16); Chapa Pathen chu apengin (Lk.2:11); Lhagao theng Pathen chun Mary chu akijil sah'e (Lk.1:35).

c. **Lhatdoh na'a.** Pa Pathen in Calvary'a lhatdamna natoh kitohdoh (sacrifice) chu asangin (Heb.9:14); Chapa Pathen chu akitohdoh chu ahin (Heb. 9:14); Jesu Christa chu tonsot Lhagaova kipedoh ahi (Heb. 9:14).

d. **Huhhing na'a.** Lk. 15:22 na'a chapa vahmang pa apan ana san bangin Pan chonse lungkisih'a hunggho chu asangin, angai dammin, golvah abolpeh'in; Chapa Pathen chu

Kelngoiching pa kelngoi mang ho holdoh dinga chepa chu ahin (Lk.15:4); Lhagao theng Pathen chu tahsan thah ho mahor namkhum chu ahi (Eph.1:13).

e. **Kipunkhom na'a** (Communion). Pa Pathen'in ahenga hunga kiloikhom dingin akouvin (Eph.2:18); Chapa Pathen in akicham pin (2 Cor.5:19); Lhagaotheng Pathen'in kipunkhomna le kiloikhomna chu asumolsoi (Eph.2:18).

f. **Taona'a**. Pa Pathen chu taona sang ahin (Jn.16:23); Chapa Pathen minna chu kitao ahin (Jn.6:23); Lhagaotheng Pathen chun taoje eihilui (Rom.8:26.).

g. **Loupina'a**. Pa Pathen chun Kumsang lenggam chu ana sanding ahin (1Cor.15:24); Chapa Pathen in ivou'u leh ihinao ama'a banga akhel ding ahin (Phil 3:21); Lhagaotheng Pathen chu mikoukhom ahi (Rev.22:17).

h. **Penthah na'a**. Pa Pathen chun mi pengthah ho chu loupina in anasun doh'in (Luke.10:20); Chapa Pathen chun athisan lutah chun chonset ho chu asotngimin (Eph.1:7); Lhagaotheng Pathen nin kikhelna, Penthahna'a kikhelna kidangtah chu aneisah ahi (Jn.3:3-6.).

Trinity'n Pathen hinaho abonna anei kimu

Hina (attributes)	Pa Pathen	Chapa Pathen	Lhagao Theng Pathen
Tonsot	Psalms 90:2	Rev. 1:8,17	Heb. 9:14
Thaneitah (Omnipotent)	1 Peter 1 :5	2 Corinthians 12:9	Romans 15:19
Ijakai hesoh (Omniscient)	Jeremiah 17:10	Revelation 2:23	1 Corinthians 2:11
Muntina um (Omnipresent)	Jeremiah 23:24	Matthew 18:20	Psalms 139:7
Atheng (Holiness)	Revelation 15:4	Acts 3:14	Luke 1:15
Thutah (Truth)	John 7:28	Revelation 3:7	I John 5:6
Pha dei (Benevolent)	Romans 2:4	Ephesians 5:25	Nehemiah 9:20
Kiloikhom (Communion)	1 John 1:3	1 John 1:3	2 Corinthians 13:14